



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 7

Liverpool-i Preston keeper Woodman
alizüchtsü mulunga agizükogo

Thailand longkak aiter temi
PM anentsü akhanger

VOL. XXII ISSUE NO. 255 (ADOK 255)

DIMAPUR

AMUNGNÜ (SUNDAY)

AAMI (JUNE) 29, 2025

₹ 5.00

AYO-i taxi verification drive July 2 tashi atsülanger

Kohima, Aami/June 28 (TYO): Angami Youth Organisation (AYO) ajanga Nagaland nung local aser regional taxi tem verification drive tang tagidak aliba July 2, 2025 tashi atsülangtsüogo.

Iba osang ya AYO tir Kesosul Christopger Ltu aser külem tenzüker temi osangbener den jembidang ashi.

State tesem ajunga nung local aser regional taxi tem ochishia aser shidak amshidaktsütsü nükjidong nung iba verification campaign ya June 24 nü tenzüker aser iba drive tenzüker mezüing anogo pongu nung taxi 1,427 jangjatepogo, ta Ltu-i ashi.

Ajisüaka iba inyakyim ajanga metokmeperi aser timtem aika putet aser tarutsü nung yangji temulung agütsütsü nüngdaker, ta ashi.

Taxi meyerijang ka dak tema verify süogo, saka gari tenet documentation peria maliba

mesüra verification mapang kibur mesüra driver maliba yong mejangjateti lir ta pai ashi.

Item gari nem official verification sticker agüja mali aser kiburi nüngdakba documents bener aruba sülen ang agütsütsü.

Mapang agi meperiba aser tesem kar medensemba ajanga tesem aika junga mawajem aser driver aser kibur aikati pei designated slots memenep, ta ashi.

Iba ken o jembitsü atema AYO ajanga Honibar nikongdang ajungben senden ka jatepa July 2 tashi atsülangtsü telemtetba agi aser iba sülenbo AYO verified stickers maliba taxi kata mesenzüdaktsütsü, ta pai ashi.

Field-level verification campaign ya July 3 nü nungi tenzüchtsü aser iba mapang paperwork masü on-ground inspections alitsü, ta Ltu-i metetdaktsü.

NPP tashi Northeast nung lir: CM Sangma

Kohima, Aami/June 28 (TYO): Meghalaya Chief Minister aser National People's Party (NPP) tir Conrad K. Sangma-i NPP ya national status bena lir aser telung tashi Northeast nung tera yanga lir aser Northeast asoshi bendanga agütsür inyaktsü temulungtetba nung lir ta shi.

Hokulbarnü Kohima nung 5th Regional Catholic Youth Convention nung dener ano NPP Nagaland State Executive Committee senden mener aonung menur osangbener den sensaksem akaba mapang, Northeast nung lisopur aser tribal kin asoshi ola adokba nung party amendaka lir ta Sangma-i nenshia ashi.

"NPP ya national party ka lir, aser tashi ya region nung tera yanga lir," ta pai ashi.

Citizenship, maitsü aser terenlok ama region nung kongshiba ken o balala asoshi NPP-i maneni ajang-ajanga nokdaktsü, ta pai ashi.

Party zünba indang jembidang, Manipur nung 2017 küm NPP vote share shilem 6 aliba 2022 küm shilem 17 akum aser Nagaland nunga MLA ana dang aliba 2023 elections nung pongu kumogo ta pai ashi.

"Political party ka yangertsü ya mapa temela masü, aser talisa Northeast nung kanga tasak. Saka zükla moi aser regional ken o nung ranglokba ajanga local sapang nungi tangbo India nung national

party trok nung NPP ya ka lir," ta Manipur CM-i ashi.

Mapang talangka Northeast nung yimtenren tsütsü lungjemmer ola adokba meliasü aser aiben linük nung telemtetba agidang shilem peria magitet, ta ashi.

Regional party temi Nagaland, Manipur, Mizoram, Arunachal Pradesh aser tesem balala nung yimtenren yimya melenshiba mapngka agitsü nüngdaker, ta pai ashi.

Pai tesüoba election cycle nung menuba nungi angazüka 2028 elections atema teeraba nungi tenzüchtsü aser mapang tali indoktsü sentong aliba lemsatepa liasü.

Northeast nung rail agi sendaktepa maliba stateji Meghalaya ya kisüing lir aser iba indang asüngdang dang, nüburtemi memulungba den Inner Line Permit (ILP) mapa kuma inyaktsü akhangba ajanga lir, ta Sangma-i ashi.

NGOs aser pressure groups temi illegal immigration mechi khuret lemsatepba ya shidak lir aser sorkari demographic structure wazüka ayutsü asoshi ILP dang tajungba mechanisms bushiba mapang lir ta Meghalaya CM-i ashi.

Rongsenketzüing terenlok aser senzüsempongba nung rongsen ajemba tsütsü railway services kanga tongtipang lir, aser tatem nung ajaki mulungteptsü imlar, ta pai ashi.

WNYF ya Dimapur nung arok ajungtsü asoshi tentet

Dimapur, Aami/June 28 (TYO): Democratic aser civil society mashi ka nung senso ajaki pei nübur ajungtsü mechi lokti tentetstü aser ayongzüchtsü constitutional rights lir. Telungjem tangatetba ya lokti tentet balala jatetba ama masü saka lokti tentet balala banner ka küboki aitdaktsütsü asoshi lir.

Asen nüburtem kumzüka, security, temeden aser ajangzüchtsü aser Naga nunger adianu ama tanüla shidakba wazüka ayutsü asoshi lungjemmer nokdaktsü nüngdakba ajiteta Naga kin balala indang lanur lokti tentet balala lungjemmer Western Naga Youth Front (WNYF) ya Dimapur melemsai alidang October 14, 2024 nü tentet, ta WNYF sangdong ka ajanga ashi.

Item lokti tentet ajunga ya melemsai aliba Dimapur nung pei tribal apex bodies temi temelaba

agütsü (unit ka dang temelaba angutsü atar), aser WNYF framework telungzüker nung pei kin tenüing nung adentsü temulungtetba nung lungjem, ta sangdong ajanga ashi.

WNYF yagi administrative jurisdiction kecha nunga kibur kuma mali aser onoki taoba mapang melemsai aliba Dimapur telungzüker nung ozü züngsem aliba region ajunga atema bilema inyaker, koba kin temeja ka kisüing mesü saka Naga nunger lokti balala dener nokdaker.

Züngsem organisation ajunga indang tir tem aliba official Executive Council tang Nomination Committee ama WNYF indang ketdangpur ajunga shimtsü mapa nungloktsür inyaktar. Ajak asoshi telungjem aser ajak adentsü mechi danga Naga tribal youth organizations tang tashi arua

medeni alirtem dendaktsütsü asoshi iba committee lapoka lir aser pelashishia agizüker.

Telungjem nung o kisüing masü mapa, bendanga agütsüba aser tasü aitba nüngdaker ta onoki amanger. Anungji külem adianu aser adianutsürtem asen nübur ajungtsü aser kumzüka ayutsü asoshi iba arok sapang nung shilem agitsü pelashishia jaoker, ta Western Naga Youth Front indang Executive Council (Nomination Committee) sangdong ajanga ashi.

Iba sangdong nung meyonngnem agütsür ya Zeliang Youth Organisation, Dimapur Rengma Youth Organisation, Western Chakhesang Youth Organisation, Diphupar Naga Youth Organisation, Dimapur Ao Youth Organisation aser Lotha Youth Organisation Dimapur tir tem alitsü.

Lisopur temeden wazüka ayutsüla aser aibelener merenshitsüla: AKTD

Dimapur, Aami/June 28 (TYO): Naga nübur indang maitsü, temeden aser akhi otsüla-oboula mapang nungi kibur süa aliba ali kumzüka aser wazüka ayutsü temulungtetba akang-akanga lir, ta Ao Kaketshir Telungjem Dimapur (AKTD) sangdong ka ajanga ashi.

Asen tera ya sobaliba kisüing masü, puti otsü, legal aser temeshi lir. Iba tamendak dak melenshitsütsü merangra, ajibo asenok libaliru anema inyakba alitsü.

Anungji iba dak sendakba nung tawa Naga nunger masüba nisung temi ashikülaka indigenous inhabitant certificates yanglua itemji amshia ozüing alema ali aliba aser lisopur atema kisüing agüja aliba maongka agiba khukhua aitsür, ta AKTD ajanga ashi.

Ibai kulak-kü bong mapa kisüing masü saka Naga nunger loktiliba aser yimtenren asoshi tebilemtsü tulu lir.

Ozüing alema ali alizüchtsü asoshi lisopur maitsü tim

masüba nung amshia taila documentation amshiba Dimapur Naga Students' Union (DNSU) ajanga mapang shidak nung kaktetsüba asoshi tenüingsang agütsür, ta ashi.

Naga nunger lisopur tem maneni constitutional aser customary ozüing sülen tashi anga anidakba mapang dangar temi pei ajangzüchtsü mechi item ozüing raksaa, aiben kulizüing kaket tiazü yanglua, proxy ownership (benami) aser pei agitsü kisüing bilemba nisungtem den lungjemmer iba ama tim masüba mapa inyaka arur.

Ibai ali nung kibur akumba indang kisüing masü, ibai Indian Constitution indang Article 371(A) nung sen nem temeden agüja aliba anema indang-indanga inyakba lir, ta AKTD ajanga ashi.

Ajidang masü Nagaland Land and Revenue Regulations (Amendment) Act, 2002 nunga tejangja ketdangsür nungi temelaba makai lisopur masüba

nisung nem ali magütsütsü jangja-jangja shia lir.

Iba ama aibelen mapa ajanga asen maitsü nung tetsükdatsü agütsür aser asenok kumzüka ayuba inyakyim samatsür.

Anungji AKTD ajanga tekeratiba nung ashikülak yimya amshia indigenous certificates yangluba bushisüngdangtsü aser agientsütsü akhanger.

Indigenous certificates agütsüba ketdangsür, iba inyakyim nung dena alir, tajangzüker angur aser tetsüingta nung shilem agir ajunga jangjateta merenshitsüla.

Tarutsü nung lisopur jenjang mashi lenmang nung amshiba nungi kumzüka ayutsü mechi verification protocols tajungba amshitsü akhanger.

Inner Line Permit (ILP) ozüing tesashiba nung mapa kuma inyaktsü, tribal hohos, civil society aser kaketshir tentet den lunghemer teti asoshi Indigenous Vigilance Taskforce ka tentetstü ayongzüker, ta AKTD sangdong ajangasa ashi.

North East India nung Radio angartemi kuli agütsütsü App ka lapokogo

Mokokchung, Aami/June 29(TYO): North East India nung Radio angartem asoshi The

Listeners Feedback App ta sür "RAISE"(Radio Audience Interactive Survey and Evaluation) ta sür App ka 2025 June 27 nü Additional Director General (A, BO & CO-Akashvani), North Eastern Zone Shri. Ashish Bhatnagar-i North East nung station 12 shimteta

aliba nung Virtual Conference ajanga tenzüchtsüogo.

North East India nung iba App ya ajanga shimteta aliba station-tem nung radio angartemi radio nung osang agütsüba kuli agütsütetstü. Akashvani Mokokchung iba nung ya shimteta lir, anungji AKashvani Mokokchung angartemi iba maongka ya agitetstü.

June 27 nü Akashvani Mokokchung station nunga iba sentong ya agidang Akashvani Mokokchung angar parnok 33,office staff,casual assignees ta ajak agi nisung 65 adenshia iba sentong kanga dang takok ngua agi aser iba sentong nungsa Akashvani Mokokchung angar tantsü tambu(senior citizen) ishika nem senpet agüja tushia liasü.

KANGA SASAR

Tir Yimyim adok June 28, 2025 tapak 7 nung Chuchuyimlang Merüshiba Asotsür Telongjem Kohima-i Tenüingsang Agütsür ta adoka alibaji Tir Yimyim nung inyakeri aibelena tamalen adokba kasa sangdong adoktsüba liasü. Iba aibelen tulu asoshi kanga sasar.

~ Yimozülur. Tir Yimyim.

Tripura CM-i Agartala nung mezüngbuba cybercrime police station semzüksü



Tripura Chief Minister Manik Saha-i Honibarnü state nung mezüngbuba cybercrime police station, AD Nagar, Agartala nung semzüksütsüba mapang tangokba noksa nung angur.

Agartala, Aami/June 28 (Agencies): Tripura Chief Minister Manik Saha-i Honibarnü state nung mezüngbuba cybercrime police station, AD Nagar, Agartala nung semzüksütsüba mapang tangokba noksa nung angur.

Cybercrime police station tasenba ya investigating complex aser Tripura ajunga nung internet dak sendakba aibelen atema central unit ama inyaksangshitsü.

Station lapokba sentong nung o jembiba mapang Saha-i, techonology aser talisa mobile phone aser internet mashiyimi amshiba ajanga lendong bener arutsüba indang jembiba liasü.

"Internet ajanga nisung ajak alima den sendakteptsüogo, saka iba tesendaktep ajanga lendong tasen bener arutsüogo. Ozüing raksartemi nüburtem mashi tesem ka nungi parnok tsüingdong tonga mruaka target süteter," ta Chief Minister-i ashi.

Internet amshitetba smartphone ka ya tanga noknü dang nungi lendongba lir ta shia pai, "nisung ka mesüra kibong ka raksatsütsü atema mobile phone kaji teperi. Ni kecha tatidakba makai ashir- iba ya AK-47 dang nungi lendongba,"

Saha-isa, cybercrime anema rara ya "tanüla den rara" ka aser "space den rara" ka ta shia police dang technical tsütsü inyaksangshi ajungketshitsü mepeshia liasü. Paisa, officer tem ya cybercrime dak sendakba training agiatokogo

aser kanga kara renloka aoba technology den jangyu medema law enforcement indaksütsü atema jenjang agidar, ta ashi.

"High-tech crimes tem den technology ajanga dang raratetsü. Ozüing raksartem ama asenok inyakyim aser tasa-a renloka aotsüla," ta pai ashi.

Maneni pai artificial intelligence kanga kara renloka aoba indang lemsatop aser iba ajanga cyber ajanga amokeren tali akümtsü akok ta ashiba den maneni küm küma alitsü ayongzüka liasü. Tripura ya Bangladesh den arrtsü nung aliba indang jembiba mapang pai, arrtsü adener online ajanga amokmerentem tali küma aotsü ana nung aliba indang tekümdangtsü metetdakja liasü. "Tripura ya corridor ka kümogo aser digital mashiyimi amshiba nokdangtsü atema asenok küm küma alitsüla," ta paisa shisem.

Chief Minister-isa, state indang digital governance indang jembiba, kong panchayat jenjang nung three-tier e-office system ka densema lir. Ajisüaka pai, technology kanga bulua amshiba den hacking, viruse aser tashioktsüba ken o tali küma aotsü akok ta ashi. Pai, nüburtem dang helpline numbers 112 mesüra 1930-i call süa temulung melema bilemba inyakyimtem ajak indang metetdaksütsü mepeshia liasü.

Sentong nung Tripura Director General of Police (DGP) Amitabh Ranjan-ia o tatsüka jembiba aser pai cybercrime tali akümba ajanga

kongshiba indang lemsatop. Pai, cyberbullying aser blackmail tali küma aoba indang metetdaksü koba tanurtem dak kanga ataloker ta ashi.

"Tanurtem blackmail asütsü atema Morphed noksatem amshir. Iba amala ozüing alema inyaksangshibatam ya tali küma odor. Onoki nüburtem dang iba amala tatalokbatem indang kecha tetsüba makai osang agütsütsü mepeshir," ta DGP-i ashi.

Paisa, mapang shitak nung osang agütsüba ajanga tarutsü nung timtem adoktsü aliba nungi jenbor ta ashi. "Senotsü amshiyim nung tashioktsüba atalokra aser onok nem mapa shitak nung osang agütsüba onoki sen transfer asüba nokdangtetsü. Linük ajunga nung onoki sen crore 3,400 akoksatsü aliba nokdangogo. Tripura nung crore 5.46 kümzükgogo aser sen lakh 32.50 bo ken o kanga junga asadangba sülen akoksar alirtem nem meypa agütsüogo," ta pai ashi.

Tawa 'Mann Ki Baat' sentong nung Ato Kilonser Narendra Modi-i "digital arrest" indang jembiba lempshia jembiba mapang DGP-i, cybercrime anema raratsü atema sorkar bendanga agütsü lir ta ashi.

Cybercrime police station ya training shitak agir aliba officer temi achaayangtsü, kong Deputy Superintendents aser Superintendents of Police den digital investigation aser forensic analysis nung mongintem densema lir.

Kamakhya Temple atema ano ropeway ana yanglutsü: Assam CM

Guwahati, Aami/June 28 (Agencies): Assam Chief Minister Himanta Biswa Sarma-i Honibarnü Kamakhya Temple semdangba mapang, temple den tesendaktep tajungba küm daksütsü atema ropeway project tasen ana benoktsü ta metetdaksü.

Ropeways tasen ana yanglutsü aliba yagi Kamakhya railway station aser Sonaram field na tenem nung aliba iba temple den sendakteptsütsü.

Sarma-i ashiba agi, project anaprongla atema mapa tenzükgogo aser tender tema

sangdongogo. "Ropeway ka Kamakhya station nungi Kamakhya temple tashi yanglutsü aser tanga ka Sonaram field nungi yanglutsü. Ano ropeway ishika yanglutsü atema dang asadangdar," ta paisa shisem.

Ropeway tem yagi temple semdangertem senzusenpong mapa tajemba küm daksütsü imlar aser iba den iba tesem semdangtsü atema tezübaba küm daksütsü. Iba ajanga state nung religious tourism jenjang ajungkettsü ta ketdangsürtemi amanger.

Ambubachi Mela

tembangba sülen anogo ana lir Chief Minister temple nung sarasadema liasü. "Ambubachi benjung anogo ana tejakdang tembangogo, saka ni jelia marutet, kechiyong tekülemertem aika liasü. Ni darshan atema tanüang maongka nguogo," ta Sarma-i ashi, shibai par kibong den iba temple semdanga liasü.

Kamakhya Temple ya Guwahati kübok Nilachal Hills nung amenoka lir aser 51 Shakti Peethas rongnung tejentiba ka ta züingshir. Iba ya Tantric practices atema centre ka lir.

DLST-i aitsür aser shisabolua bilemer

Dimapur, June 28(TYO) : rongsen lenmang nguteta Dimapur nung aonsutsü taküm aliba bendanger kati ayoker tsümar kati Ao senso tajung ka tenüing agi Meyi Jamir dak teka ia mezüngmeshiba osang angashia kanga jashir aser sashisashia aitsür. "Koba kuli agi südir sang, aonsutsü ayoker, tsümar chanu ka tenüing agi Rohiit-i tai maketba aonsutsü alii arur senso ka dak teka aibaji Nagaland nung Naga nung mezüngmeshiba aser tsübudaksütsü inyakba mapa ka lir," ta Dimapur Langpangkong Senso Telongjem sangdong ka ajanga metetdaksüogo.

Iba lendong atalokba ken o ya metpur o takoksa ajurur na tsüingda tembanger asütsüa akok, saka Nagaland nung rongsen lenmang nguteta taküm aliba bendanger kati sensoangertem dak teka ia mezüngmeshiba mapa jagi temulung kanga yiruogo aser mulung animesüngzükteter. Ibai bendangeri lisopurtem amokmerena mezüngmeshiba mapa ka lir ta DLST sangdong ajangasa metetdaksü.

"Item ama bendangertem, shirnok ket nung asenok rongsen ajak yur asenok mezüngmeshir, parnoki asenok alenbangtsü merangba nungi asenoksasa asenok küm teta mao tashi asenok mulung animesüngzüktetsü," ta DLST tir Wb.I.Sanen Longkumer aser tongi zülur Wb.Temsüyanger nati kasa sangdong nung metetdaksüogo.

Atoizu nung "Dharti Aaba Janbhagidari Abhiyan" camp agiogo

Dimapur, Aami/June 28 (TYO): Zunheboto District Administration kübok Additional Deputy Commissioner, Atoizu-i ayongzüka June 28 nü Atoizu jila Dobashis Hall nung "Dharti Aaba Janbhagidari Abhiyan" camp agiogo.

Iba sentong nung Zunheboto District nung Atoizu Sub-division kübok yimtsüngtem nungi nisung 500 dak temai shilem agia liasü. Shilem agirtem rongnung Village Council züngsemtem, Gaon Bura tem aser beneficiarie tem densema liasü, shirnok sorkar service balala agitsü atema bushirtem lir.

Camp mapang item inyakyimtem benoka inyak:

1. Aadhaar enrolment aser updates
2. Scheduled Tribe (Indigenous Inhabitants) Certificates aser Permanent Resident Certificates atema

3. CMHIS, Ayushman Bharat, aser PM-JAY nung züingoksemba
4. KCC loan applications verification
5. MNREGA job-card registrations
6. IGNOAPS aser PMMVY information Issuance
7. NFSA ration-card form lemtsü.

Beneficiary tem senzusenpongtsü atema yimtsüng ketdangsürtemi anepalutsü. Extra Assistant Commissioner, Atoizu, Dr. Samuel Akho Konyak P, NCS-i iba camp ya achaayang aser pai departments, Village Councils, Gaon Buras, aser beneficiary tem ajak dang parnok teyari atema kanga pelaba lemsatapa liasü. Paisa, iba camp ayongzüka akaba nükjidong atalokba atema temulung asüba lemsatapa liasü.

Acupressure and Chiropractor Therapy Camp ayonger

Dimapur, Aami/June 28 (TYO): Indian Red Cross Society, Dimapur District-i sangdong ka ajanga, anogo pongu atema Acupressure and Chiropractor Therapy Camp ka ayongzüka sangdongogo.

Camp ya "On the Side of Humanity omen nung ajemdaker June 28 nü Lions Health Centre, Lions Club nung tenzükgogo aser July 2 nü tashi agitsü.

Deputy Commissioner, Dimapur, Dr. Tinojongshi Chang, NCS-i, iba camp yagi Dimapur aser temeket nung alirtem mongintem tawabangba kübok temang nung ngoyangoshitem nungi taneptsü angutsü atema maongka tajung ka agütsür, ta ashi.

DC-isa, taneptsü angutsü atema tanga lenmang aliba tajangzükg indang lemsatop aser ashiba agi, shirnoki temekok surgery maginer parnoki ken o ashishitsü atema camp semdangtsüla. Camp ya temang

telen balala tashiba aser tayangbatem aser musculoskeletal ken o tem atema viable non-surgical solutions ka agütsütsü nükjidong nung ayongzükgogo.

Anogo pongu atema nisung shia züingoksemba taah sen 100 asütsü aser Dr. Ravinder Bishnoi (MD in Acupuncture) Th. Kailash Kumar (MD in Chiropractor) Dr. Mahendra Singh (MD in Acupuncture) nungeri anepalutsü.

Camp mapang acupressure, chiropractor therapy, fire cupping, vibration therapy, aser magnet therapy agütsütsü. Item service tem ya shirnok teberem, sciatica, teloktep ayangba, cervical issues, thyroid tebilemtsü, tekolak menüa dang aliba aser asthma o arthritis nung amala timtem agi kangshir parnok mozü medeni taneptsü agütsütsü atema lir

Session ya anogoshia 9:30 ako nungi 1:00 ako tashi aser 3:00 nungi 6:30 ako tashi agitsü.



June 28, 2025 nü Nagpur nung Constitution Preamble Park semzükba aser B.R. Ambedkar kürakyanglu semzükba sentong Chief Justice of India B.R. Gavai, Union Minister Nitin Gadkari aser Maharashtra Chief Minister Devendra Fadnavis nungeri tenangzükba agiba noksa nung angur.

Linük longjemaalitsü atema temzüng kadang nüngdaker: CJI Gavai

New Delhi, Aami/June 28

(Agencies): Honibarnü Chief Justice of India, BR Gavai-i Jammu & Kashmir nung Arlla 370 agienba pusema, linük longjema alitsü atema asenoki linük temzüng ka dang nüngdaker, ta metetdaksü.

Paisa, iba ken o Supreme Court matsüngdang benokba mapang nung judge pongui akümba bench-i Centre sorkari Arlla 370 agienba pusemba obendang agütsü, ta ashi.

Honibarnü Maharashtra kübok Nagpur yimti nung Constitution Preamble Park

semzükba aser B.R. Ambedkar kürakyanglu semzükba sentong jembidang Chief Justice of India B.R. Gavai-i item o ya jembia liasü.

Kasa sentong nungji Union Minister Nitin Gadkari aser Maharashtra Chief Minister Devendra Fadnavis na densema lenirtem aika liasü.

CJI Gavai-i, "Arlla 370 agienba anema onok (SC) matsüngdang ken o benoka liasü. Iba ken o angadanga mapang nung ni Dr Ambedkar-i jembiba o bilemteta liasü, pai 'linük ka atema temzüng ka

dang nüngdak' ta jembia liasü. Asen linük ya longjema lidi süra asenoki temzüng ka dang nüngdaker," ta ashi.

2019 küm August 5 nü Centre sorkari Jammu & Kashmir nung Arlla 370 agienba sülen Union territories ana kümja liasü.

"Pakistan süaka, Bangladesh süaka mesüra Sri Lanka ama asen kidanger linüktem reprangdangang. Kodangsa asen linüki tayongzükbatem ajurudir asenok longjema dang alir," ta paisa metetdaksü.

Pakistan-i kiralongrar camps aser launchpads tanaben amenoktsü meranger

New Delhi, June 28

(Agencies): Operation Sindoor mapang nung India sepaitemi Pakistan telung nung aser Pakistan occupied Kashmir (PoK) nung kiralongrartem camp 9 amakba sülen tang Pakistan-i tanaben kiralongrartem launchpads aser training camps amenoktsü meranger, ta osang ka ajanga metetdaksü.

April ita nung kiralongrartem Pahalgam amakba sülen May ita nung Indian Army temi Operation Sindoor kübok kiralongrartem camps maaka liasü.

Pakistani Army, Pakistan nunger intelligence agency ISI

aser Pakistan sorkari kiralongrartem camps, talisa Pakistan-occupied Kashmir (PoK) nung kiralongrar camps amenoktsü atema senotsü teyari agütsür, ta kasa osang ajanga metetdaksü.

Intelligence agencies-i ashiba agi, Pakistani kiralongrar organisations-i ISI den senteper Line of Control (LoC) anasa arem nung high-tech camp aika amenoktsü meranger.

Item camp ji tang Luni, Putwal, Taipu Post, Jamila Post, Umranwali, Chaprar, Forward Kahuta, Chota Chak aser Janglora nung amenokdar. Thermal imagers, foliage-penetrating radar aser satellite

surveillance paidoktsü nükjidong nung parnoki high technology amshia camp tasen amenoker.

Iba dak alia Pakistani Army aser ISI-i PoK nung launchpads 13 amenokdar. Kel, Shardi, Dudhniyal, Athmuqam, Jura, Leepa Valley, Pachiban Chaman, Tandpani, Naiyali, Jankot, Chakoti, Nikail aser Forward Kahuta nung kiralongrartem launchpads ji amenoker.

Iba dak alia International Border nunga kiralongrar launchpads pezü amenokdar aser Operation Sindoor mapang nung raksatsüba launchpads-a asentenshir yanglushir.

MULUNGZEN O



OBALA I. IMTITANGIT LKR

Aso: 8th November 1967 ~ Asü: 10th June 2025

Onoki teti dang meima aliba ASÜR OBALA I. IMTITANGIT Lkr Longkong, pa shirang yipden nung aliba mapang nungi tenzüker pa akümüli wadang tempangba anogo tashi nung ozü mangyim nüksü agi sünger alidang temeimerterem kija kibong Arogo Lokti tentet balala shirnokisa nüpu, rongsen, shisatsü aser sarasadem ajanga nungita ozü mulung suneptsüoko nenok ajak dang kanga pelaba lemsateper.

Ajak dangi tsüngdong arua ozü mulungnen O melemsatepteter, saka asen teyanglur Tsüngremi nenok takum kibong ajak maneni moajangma ta ozü tamang sarasadem.

~ Temeim Kinüngtsü, Chirnur aser Kinüngertem

Vote agütsütsü atema phone amshiba mezüngbuba state ji Bihar kümogo

New Delhi, June 28

(Agencies): Taküm küm tatembanglen Bihar nung assembly election agitsü lia Honibarnü Bihar kübok Patna, Rohtas aser East Champaran district temkübok municipal trok nung municipal elections agiogo.

Honibarnü Municipal election nungji phone ajanga vote agütsü, aser ibaji ajanga linük nung vote agütsütsü atema phone amshiba mezüngbuba state ji Bihar kümogo.

Honibarney 7:00 ako nungi polling tenzüka liasü. Polling booth ajak nung EVMs amshi aser voters karibo pei kidang nungi dang phone ajanga vote agütsü.

Polling booth 489 nung vote agütsü aser iba election nung candidate 538-i toktepa liasü.

Hokolbarnü Bihar State Election Commissioner, Deepak Prasad-i, tang mezüng municipal elections nung mobile ajanga vote agütsütsü, ta metetdakja liasü.

Mobile phone ajanga vote agütsütsü atema voters-i android phones nung iba app download asütsüla. Mobile app ajanga vote agütsütsü atema teintet sensotem, matamabensartem aser mashisa tetsürtem nem temelaba agütsür.

Prasad-i, "Iba facility atema voters-i E-SECBHR app download asütsüla, ajisüaka parnok mobile number ji voters list nung alitsüla. Iba app ya Centre for Development of Advanced Computing (C-DAC)-i yanglu," ta metetdaksü.

Ajisüaka taküm October-November nung taruba Bihar assembly election nunga iba app ajanga vote agütsütsü atema melatsü asü memelatsüar memetet.

State Election Commissioner Deepak Prasad-i, election teladak süa agitsü atema election ketdangsertemi meranga inyaker, ta metetdaksü.

Ano mobile phone malir voters-ia Bihar Election Commission indang website nung e-voting option amshia vote agütsütsü akok.

Ochimashi mapatem nokdangtsü atema blockchain technology, facial recognition aser scanning ama security features aika lir, ta paisa metetdaksü.

Hokolbar nikongdang tashi nung mobile app ajanga vote agütsütsü atema voters 10,000 dak temai tenüng agütsür liasü, aser voters 50,000-i election commission indang website ajanga vote agütsütsü akok, ta Prasad-i metetdakja liasü.

ISS nungi Shubhanshu Shukla-i PM Modi den jembia

New Delhi, June 28

(Agencies): Honibarnü India nunger astronaut, Shubhanshu Shukla-i International Space Station (ISS) nungi Ato kilonser, Narendra Modi den jembio.

Shukla-i otsü tasen ka yangluba atema Ato kilonser Modi-i pa nem tenüngsang agüja pa dang, "Tang ana jembiba mapang nung India nunger crore 140 nü den lir. India nunger tepela, nüma atangba aser teimla ajak ni nü den lemsateper. Nai asen linük wako space-i bener tua aliba mapang nung ni nü nem tenüngsang agütsür aser mission tajungba nung tembangtsü atema saraademsür," ta ashi.

Shukla-ia, "Ni nü dang pelar

aser India nunger crore 140-i tajungtiba bilemtsüba atema pelar. Ni yangi kanga junga lir. Ni kanga pelar. Ni lanuwa mapang nung ni astronaut akümtsü ta ni bilema maliasü. Ajisüaka nü lenisüba kübok mangdang ataloktsü atema linüki maongka angur," ta ashi.

Bodhbarnü Shukla densema nisung pezü SpaceX Dragon spacecraft ka nung NASA Kennedy Space Centre, Florida nungi apusoa liasü.

Shukla den tangar asemji US nungi Peggy Whitson aser mission specialists ana- Poland nungi Sawosz Uznanski aser Hungary nunger Tibor Kapu nunger lir.



June 28, 2025 nü Bengaluru nung Samajika Nyaya Jagruti Vedike Karnataka-i 'Caste Census: Retrospect and Prospect' onük nung ayongzükba seminar nung Union Minister for Environment, Forest & Climate Change, Bhupender Yadav agizükdang tangokba noksa nung angur.



TIR YIMYIM YIMOBILEM (EDITORIAL)

DIMAPUR SUNDAY, JUNE (AAMI) 29, 2025

Kibuba dang ataba

Nisung ajak atema atatsüba ya mapa tasak ka lir. Asenok nüngdak aika lir aser ibaji asenoki tangsa dang aginer. Asenoki manger sangwa nung takar-tulur kümner aser mapa meinyaki tepok sünga linür. Ajisüaka, asenok taküm alima nung liyonga aotsüba atema Tsüngremi asenok nem mapa aser mapang shimtetja lir. Aji oda, Tsüngremer mapangji meteta asenoki aremzüka atatsü aser inyaksüba kanga tenüngdaksü. Asenoki anogo shia asen nüngdak inyaker saka takok aser tajangzükjibo Tsüngremi dang agütsür asünungji, Pai agütsü aser moatsü atatsüba kanga tongtibang akümer. Alima nung ya asen nüngdak asoshi matayonga odang angur asünungbo Tsüngrem dak amanga imlatsü nüngdak madokla. Ajisüaka, Tsüngrem dang asen nüngdak atalokjang ta sarasadema ataba teimla jagi asenok Tsüngrem dak dang mulung lema alitsüsa akümer. Tetezü asen nüngdak langka ka atema aremzüka atadang, Tsüngrem dak amanga imlaba agi asen o Tsüngrem na tsüngda anogo shia tesendaktep ayur. Aji oda, nisung ajak dang nungi alaka Khristan taküm ka asoshi atatsüba ya kanga tongtibang lir. Tsüngremer mapang aser anogo tera matateti asenok aritepdang teti atema taküm nung takoksa tulu angutsü ta asenoki angatettsüla. Tsüngremer mapang atatsüba David-i meteta liasü. Tila tanur David sannüka alidang Tsüngrem nisung ajanga kenü anogo pa Israel madak chuba akümtsü atema mezüja shimteter yutsü. Asenok asübo iba anogo nungi asüküm tenzükla. Asenok ka asübo iba anogo nungi sannükia moula, ki mapa meinyakla aser tsüraburtem danga tashi mangala aser taintem aküm metsübula. Asen ka asübo chuba akümtsü mezüja shimteta toktsüba anogo nungi yimsü tesüdak yimsüsür aser chuba arishi tenzükla. Aji oda, asen ka asübo chuba asütsü shina toktsüba anoog nungi chuba ama bilema ngasangatema lila. Ajisüaka, tila tanur David-i pa chuba akümtsüba Tsüngremer mapang ka nung dang akümtsü ta meteta liasü. Pai Saul chuba tepseter pa melen chuba akümtsü koka liasü, saka pai metepset. Pa chuba akümtsübo mezüja shimteta yutsü, saka pa chuba makümdang pa timtem lendong tului ai. Pa jakdang Israel nunger tamakok aiben ajuru. Pa taküm kümzüksü asoshi arem nung jenshia senzü. Ajisüaka, David-i Tsüngremer anogo matong tashi pai pasasa chuba maküm. Pa arem nung tsükchir tsüngdang jenshia senzüdangang pai Tsüngrem den jajatsü tenzük. Pai Tsüngrem dak jenok. Iba mapang pai mejemba kentem tanü asenok asoshi tashi tasen angudak küma asenoki Tenüngsang ken azünger. Aji oda, David chuba kümer külen ano pa dak nungi jakzükba nungiang asen Kümtetdakba Yisu Khrista iba limai aru. Item ajakji nisungi Tsüngrem dak amanga ataba temoatsütem lir. Aji oda, Tenüngsang Ken 27:14 nung David-i Kibuba dak teimla ayutsü indang shia lir. Tetezü, Tsüngremer mapang ka matong tashi teimla mesamai atatettsüla. Tsüngremer mapang ka ataba ajanga Yisui Lazar tasü nungi shia arudaktsütet. Ashiko, Yisui tebu Tsüngremer mapang ka matatet asübo Lazar-a tanaben shia marula. (Yohan 11). Nai Tsüngremer mapang ka atema aremzüka ataa lira temoatsü, kechiyong Isaia 40:31 nung ashir, " Shirnoki Kibuba dang ataa alir, parnok tashi tasen angutsü, mongzütem ama tashikang agi atutsü, parnok asemtsü saka manitsü, parnok jajatsü saka melulatsü." David timtem nung liaka, pai ashir, ni akümli nung Kibubai kü dang ajungba angutsü (T.Ken 27:13). David-i item tajung anogotem atema aremzüka ata aser pai angu. Pa mongzü tashikdang tener atuba ama chuba mendeni tudaktsü aser takar kümdaktsü, pa ania maküm aser melula. Tsüngremi nangzükbabo inyaker, asenoki Pa mapangji meteta atatettsüla.

OLEMSABANG

Ajongben timtem mapang teyaritsü-yim tetuyuba kar:

~ Dr. N.Meren Imchen, Lower Bayavu Hill

Meimchir taküm nung ajongben memetetba temang timtem, yiru-yipong mesura tensa tamajung (Medical emergencies) aiben ajurur. Hospital matongdang mesura mozü shiteter (care giver) majurudang asen sasa mesura külemi alir medemer teyaritep ajanga jongdak nung tim anebalu mapa tila ka inyakba ajanga taküm aotsü aliba nungi mesura timtem tulu ka akümtsü aliba nungi taküm kümzüksü akok.

Iba dang Mezüng teyari (First Aid) ta ajar. Saka First aid ta asüba onuk ya kanga tulu aser iba atema training agia alirtemi dang teyari tapu balala agütsütsü akok, anungji iba rangben indang yangi magütsür, ajisaka oda shilem tila ka agiteta mashie nisung (layman) ajaki inyaktettsüba mapa tetuyuba (practical tips) kar source balala nungi bendena lemsateper. Teküpoklen agüja alibattem ajak ya hospital matongdang inyaksü tuyurba dang-ashi, item ya inyakerbo teperi ta masü, anungji takok tashi makokbatem ajak atema tekaraba nung hospital bushitsüla.

SITUATION BALALA:

- 1. Mashie zübu ka ajanga azü ayim dang (bleeding from open wounds):-** Asen nukjidongji koda ser azü ayimba anendaktsütsü; anungji bandage mesura su temeruk agi tashi agüja zübuji aleptsüla koba ajanga-1) azü ayimba anentsü, 2) jananungna aser infection nungi kümzüksü aser 3) komo-settsü mesepadoktsü. Iba selen hospital bushitsüla.
- 2. Teni nungi azü ayim dang (nose bleeding):-** Tenipong (nostril) anaprongla külemi tashi agi ajetteper mapang tatsüka-10/15 minutes marakzüi alitsüla aser tekolak aser tenutsü nung ice mesura tsü temokong agi metentsütsüla, iba selen manebra hospital bushitsüla.
- 3. Tekabu yirur azü ayim dang (bleeding palm):-** Meti telong (cotton block) ka mesura ne teka nung aliba romalji telong küma tashi agi amreper bandage mesura su temeruk agi aleptsüla, aser hospital bushitsüla.
- 4. Tetsüng/teka pelepdang/suktangdang mesura lokshi-shidang (sprain or dislocation/fracture):-** Yiruba tesemji marakzüdaktsütsüsa koba position nung teyirusangji timtem mali iba position nungji bandage mesura su temeruk agi sung mesura auo (bamboo splint) agi support sua aleptsüla kechiaser arakzüdaktsüra tali raksashitsü aser yakta hospital bushitsüla.
- 5. Chiyungtsü agi anang dang (Choking):-** Tain nisung (Adult) sura; 1) terongtong tapupak ana tsüngda (between the two shoulder plates) tashi agi 4/5 ben temoktsütsü, 2) tesulen nungi teberem nung azüiter ne teka ana pa tebinpang nungji ataloker tashi agi teka anajagi nungketa yoka 4/5 ben azüitsü. tanür sura; pa tejak alilen shia mejangdaktsür terongtong nung tera tashi agi 4/5 ben temshitsü, mejungra yakta hospital bushitsü.
- 6. Ajongben tashi meiti laodang (Fainting):-** 1) Tekolak tera-a teküpoklen sur tanemi mejangdaktsütsü, 2) belt, button mesura suoshi tight ajak salatsütsü, 3) lokti nungpanga lira anshidaktsütsü aser junga shia arur kelenang langka tajemtsü talem (warm sips) agütsütsüla, iba selen mejungra hospital bushitsüla.
- 7. Anupu tatsük agi laodaktsüdang (Heatstroke):-** 1) Akümpok ka bushia tanemi mejangdaktsütsü, 2) Suoshi tight/temelem lira ajak lapoktsütsü, 3) Towel ka amongloktsür tsü temokong mesura ice pack agi metentsütsü, 4) Mopung taneb/Fan agidaktsütsü, aser yakta hospital bushitsüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

North Korea dangi Laishiba yoktsü meranger America nunger 6 apu



June 28, 2025: North Korea dangi tzüym ajanga plastic bottle 1,600 nung Laishiba tilala inoker yoktsü merangba atema South Korea nung ketdangsertemi America nunger trok puogo, ta International Christian Concern (ICC)-i metetdaksü. Gwanghwa Island police-i, America nungertem anema bushisüngdang tenzükogo, kechiyong parnoki 'disaster management' ozüng anema inyakogo, ta metetdaksü. America nungertem jagi plastic pongdang nung Laishiba dang masü saka USB sticks, dollar sen aser jang inoker tzüym nung inoktsü. North Korea nungertemi tzüküm nung plastic bottle ji angutsü teimla nung America nungeri yamaji inyak. Khristan missionary tem aser meimchir temeden atema inyakba organizations-i tayimtsü nungi plastic bottle ji tzüym nung inoktsü. South Korea nunger ketdangsertemi item ama osetem arrtsü adena yokbaji 2021 nungi 2023 küm tashi nokdanga liasü. Tzüym ajanga oset balala yokba ajanga North Korea nunger kanga jashidaktsütsü aser tensa raksatsü tsübua South Korea-i iba tenokdangba benoka liasü. Tesülen South Korea Constitutional Court-i arrtsü adena item ama oset yokba nokdangba ozüngji agiena liasü. Ajisüaka South Korea Tir tasenba, Lee Jae Myung-i Tir tenangzükba agiba sülen maneni arrtsü adena osettsüset yokbaji nokdangogo.

Kibuba yimli atema asenoki tasen purapiteta inyaktsüla: Arnold Enns

June 28, 2025: Ibero-American Confederation of Christian Communicators & Mass Media (COICOM) Tir, Arnold Enns-i Arogo aser Khristan media dang digital putu nung alirtem den sendakteptsü atema inyakym melenshitsü nüngdaka kümogo, ta ashi. Interview ka nung jembidang Arnold-i, "Tang digital putu nung alirtem ayimjemtsü atema asenoki küm 60 tejaklen amshiba tasa dang amshir," ta ashi. Arogotemi media aser social media sabangtem amshir, ajisüaka tongtimbang lenla aika junga mamshir, ta pai ashi. Tongtepratep ya mission den pilatsü makok, ta pai ashi. Arnold Enns-i, "Kübo küm 60 dak tali Paraguay nung missionary inyaka liasü aser yimtitem nung Khrista osangtajung lemsateptsü atema pai 16mm films amshia liasü. Ajisüaka tanü putu nungbo technology balala amshia evangelistic campaigns agitsü akok," ta ashi. "Tongtepratep ya kanga nüngdak. Alima puti otsü nung nisungtem den tongtepratepa sendakteper tajungtibaji Yisu liasü. Pai o entepba aser otsütem ashi. Nisungtem den sendakteptsü atema Pai meteta liasü," ta Enns-i ashi. "Social media ya osangtsüsang proktsü atema tongmelang hadirtem masü saka mission mapa inyaktsü atema asalentong lenmangtem lir," ta pai ashi. "Tanü putu nung digital tensa den külemi meneptepa alitsü nüngdak. Nisungtem social media putu nung alir. Asenok-a yangji alitsü nüngdak. Ajisüaka nisungtem den sendakteptsü aser taküm melenshitsütsüsa social media amshitsüla," ta pai ashi. "Küm 30 tejaklen COICOM tenzükba mapang nungbo onok ket nung radio mesüra TV stations maliasü. Tanübo onok ket nung itemji lir. Technology nung timtem kecha mali, ajisüaka mission wadang atema tasen purapiteta inyaktsüla aser ibaji ajanga nisungtem den sendakteptsüla," ta pai ashi. Paisa, Khristan ministry aikati coronavirus wara metenzükdang inyakba ama kasa inyakym beshir; nisungtem libaliro, oshiopen aser putu tasen den apet inyaktsüla, ta ashi. "Tang tashi asenoki gari tejen amshir. Asenoki putu tasen sobaliba junga mangateter, aser ibaji ajanga Khrista osangtajung nüngdakbapurtem den asenoki pilar," ta pai ashi. Arnold Enns-i, "Tayongzükbaji technical masü saka tanela aser asalentong lir. Kangki osang memelenshir, ajisüaka iba osang prokba yimyaji melenshitsü nüngdaker. Noksa balala den yimya balala agi ajungmesoa teimla aser tekümtet osang proktsü nüngdak," ta ashi. Paisa Khristantem dang digital putu nung mission mapa inyaktsü atema jungjunga training agiba sülen amalitepa inyaktsü ayongzük. "Tan putu nung mapang ajak nung sendaktepa dang lir. Ajisüaka temelenshi adokdaksütsüsa asenoki osang prokteter asü? Joko taoba Aso (century) nung beshiba tejen inyakymtem toktsütsüla. Kibuba yimli atema tasen purapiteta tasü itta inyaktsü nüngdaker," ta pai ashi. Khristan communicators sendakteptsütsü aser training agütsütsü nükjidong nung küm 30 tejaklen COICOM (Ibero-American Confederation of Christian Communicators and Mass Media) ya tenteta liasü. Tang Arnold Enns leniba nung COICOM-i lokti sendentem aser workshops ayongzüka akar aser mission wadang inyaker. "Tongtepratep makai osangtajung proktsü makok. Tangartem ola mangadangibo tongtepratep junga mesütettsü. Nütsüngsüba mapa inyaktsü atema tongteprateptsü asoshi asenoki angazükshitsüla," ta paisa shisem.

ANOGO ABEN TSÜNGREM DEN

PEI SASA AZÜOKANG

Shibai pei tanela mazüokteter, pa teraksa aser jara maketba yimti ka mesük. Apijemtsü 25:28
Tsüngremi dak amanger shia nungi akangba tongtipang kaji pei sasa azüoker tangari toktsüaka pei teinyaktsü inyaka alitsü ajungshir. Tazüokba akaba nisungi pa jakla madak kibur akümer. Temulung nung bilemba agi masü saka tenangzükba nung alir. Tazüokba nisungi pei jembiba o mita alir. Shibai pei bang mitdir pai pei taküm soter. Tazüokba nisungi tamajunger dang meyipa langzütsü mesüra tokteptsü nungi pila-a alir, rongsen junga ketdang asür, pei mang junga anepalur. Tanü ne tazüokba akanga amentetba jagi asüng takok asoshi renemtsür. Asen taküm nung tarutsü nükla tajungji kanga tongtipang, anungji tanü aseni kechi inyaker tazüokba nung ochishia inyaktsü merangdi. Asenok tamanger taküm ka mesüka ali shi aser tanela nung pei sasa tazüokba jenjang tajungba yanglua renema alitsü kanga tongtipang. Apijemtsü 19:11 nung ashir, 'Nisung teshidangbai pa terasaba nung mekaradaksür, aser tai ka koda toktsübaji pa sentsüwangshi,' Tazüokba shisa takar alidakji teti agia senti rongsen aser toztü kar. Anungji nisung shia pei mang azüokteta temeshiba temerükba aser tetushi nung ayutsü nüngdaker. Na aser ni tazüokba nung litettsü Tsüngremer taochi meshia lidi.

China nung House church kati pastor 3 indang sangdong agütsü

June 28, 2025: 2022 küm China nung aliba Arogo ka nung Church camp ka tembangba sülen China ketdangsertemi Shanxi nung aliba Linfin Covenant Home Church nungi pastor asem apu; iba sülen küm asem-pezü süia arudang Arogoi kanga tasü itta pastor temji pusema sangdong ka agütsüogo, ta International Christian Concern (ICC)-i metetdaksü. Pastor asem- Li Jie, Han Xiaodong aser Wan Qiang nungeri ashikülak densema ozüng alema aibelen aika inyak, ta tai tonglokja küm 2 nungi küm 4 tashi tepuokdak ayutsü obendang agütsüogo, iba denji külemi dollar sen senchi 2,800 nungi 4,200 tashi achi. China nung Communist sorkari sorkari melaba organization nung register masüba Arogotem nung lenirtem nem tiyazü nung tai tonglokja apur. Tawa Linfen Covenant Home Church-i kanga tasü itta social media ajanga, "2022 küm August ita nung ozü Arogo anema inyakba sülen küm asem jungogo. Ken o angadangba mapang nung adianu asem aser lawyer temi parnoki aibelen masü, ta ajangajanga nokdakogo. 2025 küm June 20 nü Linfen Yaodu?District Court-i onok nem obendang agütsü. Adianu (pastor tem) aseme ashikülak inyak, ta aitsüogo. Li Jie aser Han Xiaodong naprong küm 3 ser ita 8 tepuokdak ayutsü obendang agütsü aser senchi yuan sen 30,000 achi. Ano Wang Qiang-a küm 1 ka ser ita 11 tepuokdak ayutsü obendang agütsüba den senchi yuan sen 20,000 achi," ta metetdaksü. "Court-i iba obendang agütsüyonga onoki iba obendang ya tim masü ta sangdonger, kechiyong ozü adianutemi ashikülak mapa meinyak aser Arogo dangi tenla arubaji ashikülak masü. Ozü Arogo ya maneni house church ka dang lir. Khristaji Arogo nung tekolak aser Arogo o yimsüsüba naji balala, ta onoki sangdonger. Onoki Li Jie, Han Xiaodong aser Wang Qiang nunger Khrista atema timtembaji pusemer, aser Kibuba den külemi Kangki aputsü melunga lir. Onoki iba obendang ajemalua agizüker," ta Arogoisa metetdaksü. "Tanga Arogotemi sarasademtsüba aser parnok kibongtem yariba atema onoki kanga pelar. Legal team danga onoki pelar. Tsüngremi maneni len ania onok kümzükang ta sarasademer. Adianu asem- Li Jie, Han Xiaodong aser Wang Qiang nunger atema maneni sarasademjang. Kibubai parnok kümzükang ta sarasademer," ta kasa sangdong ajanga metetdaksü.

Tir Yimyim

* Aonung shia tepo mevudoker mejangtsüla.

KCP-PWG züingsetem ya
parnok apuba tesem police
station tem nem bendanga
agütsüogo, ta ketdangsürtemisa
metetdaksü.

Takum bendanga agütsür amakba nung Pakistan sepai 16 tepset



Islamabad, Aami/June 28 (Agencies): Anisüngzük makaba Khyber Pakhtunkhwa province nung suicide bomber kati tapoktsü oset bena aliba gari ka anir arua military convoy ka nung atsükba sülen pokdakja Pakistan sepai 16 asü aser civilian densema nisung dozen ana dak tema yiru.

"Suicide bomber kati tapoktsü oset bena aliba gari kati military convoy ka nung atsük," ta Khyber Pakhtunkhwa province kübok North Waziristan district nung sorkar ketdangsür kati ashi. Yangji apokba mapang sepai 16 asü aser civilian tem densema dozen ana dak tema yiru.

"Iba mapang ki ana indang kilem chirepa tanur trok yiru,"

ta police tanishir kati osangbener dang ashi. Sepai pezü kangasa mejungi yirur lir, ta administrative official kati ashi.

Iba lendong ya Tehreek-e-Taliban Pakistan (TTP) nungi razüka aoba Hafiz Gul Bahadur armed group indang suicide bomber wing ajanga tenüng agiogo. Khyber Pakhtunkhwa nung telungpur temi azüdokshiba tali akumba mapang iba ya atalok.

March ita tiyong len TTP ajanga security forces anema "spring campaign" ka sangdonga mita atar amaktsü, tenük yoker amaktsü, takum bendanga agütsür amaktsü amokmerena liasü. Iba sülen Khyber Pakhtunkhwa nung 100 ben shi amakba TTP-i tenüng

agia liasü.

Küm tenzüker Khyber Pakhtunkhwa aser Balochistan nung sorkar den telungpur temi raraba nung security ketdangsür timba sür nisung 290 shi tepsetogo, ta AFP ajanga ashir.

2021 küm August ita Afghanistan nung Taliban-i yimsü asü tenzüker Pakistan nung amakba tali kumogo. Pakistan anema amaktsü renemshia Afghan li nung jenoka aliba telungpur telok tem Kabul nung aliba Taliban sorkari mesamatsür ta Islamabad-i aitsür.

Taliban sorkari item tait süba magizüker aser meyiper Pakistan-i par li nung kiralongrar tem züindaktsür aser talisa Islamic State group IS-K indang regional branch nung tai tongloktür.

Pakistan nung küm ter shi jungnüa nung taoba küm tamajungtiba liasü, aser iba mapang nisung 1,600 dak tema tepset aser item rongnung tesadang ka jungnüa security forces personnel tem lir, ta Islamabad nung amenoka aliba Center for Research and Security Studies ajanga ashir.

Thailand longkak aiter temi PM anentsü akhanger

Bangkok, Aami/June 28 (Agencies): Taoba Cambodia ato kilonser Hun Sen den phone nung jembiba temai adokba mechi tejashi nung nisung meyrirjang aika Thailand yimtiba nung adenshia Ato Kilonser Paetongtarn Shinawatra mapanungi anentsü akhanger.

June 15 nü Paetongtarn-i tang Cambodian Senate tir Hun Sen dang Thai army general densema Thailand nung dangari jembiba mangatsü ajungshiba sensaksem temai adokba tejashi nung longkak aiter meyrirjang aika Honibarnü yimti-yimtung nung adenshia liasü.

Army commander ya taoba ita arütsü nung raratepba tesem ka nung in charge liasü, kong Cambodian sepai ka tepset. Mangatettep aliba tesem nung prangbong bener raratepba sülen nisungba ya May 28 nü tepset.

Honibarnü longkak aitba ya talisa Hun Sen den phone ajanga jembiba temai adokba ajanga lir, aser Thailand nung bushisüngdang balala tenzükogo, koba ajanga Paetongtarn ya ato kilonser menden nungi atsüngdoktsü akok.

Longkak aiter tem central Bangkok nung aliba Victory Monument meketa yimtung nung adenshia linük wako aser mait sütem bener liasü. Monument nung sapang tuluka yanglua tejembir temi Thailand meimba indang lemsatepa liasü.

Iba longkak aitba nung lenirtem ya aika Yellow Shirts



Paetongtarn Shinawatra

ta sür nüngtugu telok ka nungi liasü aser parnok abensüoshi sentsü ajanga Thai chuba sülen anidakba sayur. Parnok ya mapang talangka nungi Paetongtarn tebu, taoba ato kilonser Thaksin Shinawatra den tsükchir lir, shiba Hun Sen den tesendaktep tajung lir ta ashir.

Honibarnü Cambodia nung Hun Sen-i bendanger ket nungi linük indang litsü-lika kumzüka ayutsü nangzük aser taoba ita Thai forces-i amak ta aitsü.

Mapang talangka nungi yimsü süa aruba par Cambodian People's Party tenteter küm 74 ajungba anogomung nung jembidang, Thai army temi inyakba ya ozüng alema lir ta Hun Sen-i ashi.

Cambodia litsü telungzük nung atsüka atar amakba ya linük indang sovereignty aser territorial integrity nung kanga sashia aibelenba lir, ta pai ashi.

"Tesüba mapang bendangeri

amakba, rara, kin ajunga tepsetba, lungbangba aser senzüka yutsüba aser mezüngmeshiba agi Cambodia timtema aru, saka tangbo Cambodia dangar linük den sako kumogo. Asenoki yimjung, tesendaktep aser terenlok aginer, aser linük kecha dena mangatettep mali," ta Hun Sen-i Cambodia yimtiba Phnom Penh nung party züngsem den jembidang ashi.

Linük ana tsüngta akhi mapang nungi tzü-ali mangatettep lia aru. 1962 International Court of Justice ajanga otsü aketba Preah Vihear temple nokdaka aliba mangatettep tesem Cambodia nem agütsüba ajanga tanü tashi Thailand mepelar.

Yangji 2011 nunga mapang shia kanga sashia rara liasü. UN court ajanga obendang agütsüba ya 2013 küm Yingluck ato kilonser aliba mapanga akangshia liasü.

Paetongtarn aser Hun Sen tsüngta phone ajanga jembiba temai adokba mechi par coalition nung Pheu Thai Party asoshi partner tuluba, Bhumjaithai Party-i yutsü.

Bhumjaithai ainshiba ajanga party 10 aliba coalition ya menden 255 dang lir, koba menden 500 aliba house nung tera agidang timba lir.

Ano Constitutional Court aser national anticorruption agency ajanga Paetongtarn bushisüngdang. Parnoki telemtetba agiba ajanga la office nungi atsüngdoktsü akok.

MOLUNGNEN O



Asür Mrs. Anokwala (Aliba) (26/06/1970 – 19/06/2025)

Onoki teti meima aliba asür Mrs. Anokwala (Aliba) mapang tatsüka shiranga lir ajungbena iba alima nungi pila-a aodang kija, kibong, kiyonger, kinungertem aser tembartem shirnokisa sarasadem, rongsen, nübu aser shisatsü tajungtiba agi ozü den yaritepogo, nenok ajak dang kanga pelar. Nenoki lenmang balala nungi nungita yariba ajanga onok tasü itdakja aser tashi tasen ngua mangyimba khuret tulu nung kanga anisüngzükdaktsüogo.

Onok pelaba item telok den maneni lemsateper:

1. Kohima Aliba Senso Telongjem
2. Kohima Aliba Fellowship
3. Kohima Alibalar Telongjem
4. Dimapur Aliba Senso Telongjem
5. Dimapur Area Aliba Fellowship
6. Kohima Ao Baptist Arogo
7. Kohima Chungtia Senso Telongjem
8. Mewibogie Colony Council/Youth/Women Prayer Fellowship
9. Tseminyu Town Ao Baptist Arogo
10. Aliba Senso Telongjem, Mokokchung
11. Sungkomen Baptist Church, Mokokchung
12. Aliba Baptist Arogo
13. Aliba Village Council
14. Doctors and Nurses GNRC, Guwahati
15. Ao Baptist Church, Guwahati
16. DIPR
17. PHED

Onoki nenok nisung shia dang pelaba meshitetaka Tsüngremi nenok ajak talubusa moajang ta ozü sarasadem.

~ Temeim Kinungbu, Chirnur aser Kinungertem

Israel-i tepsetba mitkar lenir asoshi Iran nung asüpila sentong agi

Tehran, Aami/June 28 (Agencies): Israel den anogo 12 raraba mapang mitkar lenir aser nuclear scientists densema nisung 60 shi tepsetba atema Iran nung state funeral agiogo.

Tasüba mitkar tanishirtem noksa keter aliba süngden Iran nunger wako agi aleper Tehran indang Enghelab Square anasa yua aliba müketa nisung meyrirjang aika adenshia liasü.

Iran nung tongtipang nuclear sites nung US-i bomb pokloktsübab sülen hopta tetenzüklen ceasefire ka ajanga iba rara tembang.

Mangyimer nisung aika süoshi tanak semer yimyiim ayima, Iran nunger wako ayiptena aser tepseter noksa amer liasü.

Iba sentong agitsü lia media campaign ka nung nüburtem dang iba sentong nung shilem agitsü ajungshia liasü aser ketdangsür temi bus aser metro angati agütsü. Sorkar indang office tem shibang.

Honibarnü ali nung aremertem rongnung Mohammad Bagheri dena lir, Iran indang armed forces indang chief of staff liasü.

Bagheri tasü mang ya pa kinungtsü aser jala den külemi arem, shirnok Israel-i amak dang tepset. Iran nung ajak agi nisung 627 tepset, ta Iran ketdangsür temi ashi. Iran-i missile amshia amakba ajanga Israel nunga nisung 28 asü ta Israel ketdangsür temi ashir.

Asürtem rongnung Islamic Revolutionary Guard indang commander-in-chief Hossein Salami aser nuclear scientist tem

nungi Mohammad Mehdi Tehranchi - Tehran nung Azad University tekolakba - densema Honibarnü ali nung remogo.

Iba asüpila sentong nung Iran Tir Masoud Pezeshkian aser Rear Admiral Ali Shamkhani - Supreme Leader Ayatollah Ali Khamenei indang advisor densema tongtipang nisung aika dena liasü. Shamkhani ya ita tetenzüklen Israel-i amak dang yirua liasü.

US Tir Donald Trump-i ano Iran nung bomb pokloktsütsü aoshi bilemandgtsü ta ashiba sülen iba asüpila sentong ya agir.

Trump-i social media nung, "Kechiba rara agi raksatsür aliba Iran linük nung 'Supreme Leader' ta ajasang Ayatollah Ali Khamenei-i pa sangdong ya tiazi ta metetaka tapi agi aser tamachi ama pai Israel den rara kokogo ta ashir," ta zülua liasü.

Trump-isa Khamenei ya kong jenoka aliar meteta lir ta shia liasü aser pai Israel mesüra US Armed Force nem pa takum mesamadaktsütsü ta ashi.

"Pa tebour kecha mejungi asütsüba nungi ni kumzüker aser pai kü dang, 'kanga pelar tir Trump' ta ashitsü menügdak," ta Trump-i pa indang Truth Social sapang nung ashi.

Iran indang Foreign Minister Abbas Araghchi-i Trump dang Khamenei indang mezüngmeshi o mejembitsü tekum dangtsü shiogo aser US aser Israel nati Iranian nuclear sites amakba nung takok balaka mongutet ta shia lir.

Nagaland U-20 Team-i goal 4 agi BFC Young Blues Elite akok



Inspire Institute of Sport (IIS) Football Ground nung Bengaluru FC Young Blues Elite team aser Nagaland U-20 football team na masaya tsüngda CM Rio-i asayartem den ajurutebpa noksa nung angur.

Dimapur, Aami/June 28 (TYO): Honibar anepdang Inspire Institute of Sport (IIS) Football Ground nung Bengaluru FC Young Blues Elite team den asayaba mapang Nagaland U-20 football team-i kanga junga asaya goal 4-0 agi kokogo.

Nagaland Chief Minister Dr. Neiphiu Rio aser pa den ketdangsürtemi Vijayanagar semdangba nung shilem ka ama iba asaya ya asaya liasü.

Chief Minister meina Nagaland nungi ketdangsür

tejentemi iba asaya repranga team pusema liasü. Dr. Neiphiu Rio tonga aoba sülen Inspire Institute of Sport (IIS)-i pa nem tetushi agüja liasü. Asaya tembangba sülen pai asaya kanga junga asayaba atema asayartem nem tenüngsang agütsüba den asayartem dang bendanga agüja asaya-a temaba jenjang tongtettsü ajungshia liasü.

Asaya nung Arap Konyak-i kanga junga asaya-a pai minute 7, 32 aser 44buba nung goal

asem idakja hat-trick ka agütsü, aser Ngangsang K Phom-ia minute 41buba nung goal ka idakja Nagaland team-i iba asaya goal 4-0 agi ayong ayonga kokogo.

Asaya tembangba sülen Advisor to the Chief Minister aser Athletics Federation of India Vice President Abu Metha-ia asayartem ajungshia liasü. "Inspire Institute of Sport-i India nem konang tetushi bener arutsüba aser linük yangerba nung shilem agirtem aniteta arudar. Asen lanurtemi temaba jenjang nung tajungtiba asayba dang masü saka Akümtsüba aser meraketa India tenüng nung asayatsü kanga tongtibang lir. Tarutsü atema khuret angatetba aser yimya tajung aketba asayartem anitettsü atema iba amala maongka ya kanga tongtibang lir," ta pai ashi.

Lenirtem yagi IIS facility semdang aser coach aser asayartem den sensaksema India nung ajak dang tajungtiba private high-performance sports ecosystem indang angazüka liasü.

Iba sentong ajanga Nagaland sorkar aser JSW Group na tsüngda tesendaktep tajungba akümba sayur.

Australia-i West Indies den mezüngbuba Test asaya kokogo

Aami/June 28, 2025 (Agencies): Barbados nung Australia aser West Indies na mezüngbuba Test asaya nung Josh Hazlewood-i wicket pongu agia Australia-i iba asaya run 159 agi kokogo.

Tanabuba innings nung West Indies pur asayar 10 prongla tasemnübuba nikongtsütsü session nung out asü aser Australia-i anogo asem anunga lia asaya kokogo.

Asaya akoktsü atema run 310 nüngdaka West Indies pur tanabuba innings tenzük aser Kraigg Brathwaite kara out süaka John Campbell aser Keacy Carty nati asaya jenjang yanglushia parnok 47-1 liasü.

Ajisüaka Hazlewood-i ball

kanga junga ona asaya ya Australia-i amokbanger asayatsüsa jenjang kati ani, aser West Indies nung batter pezü out asüba tashi nung parnok run teku dang yangluteta liasü.

Asayar 5 out asüba mapang tashi nung WI team-i run 56 dang yangluteter liasü aser parnok asoshi asaya akoktsü kanga tasak aküm. Ajisüaka Justin Greaves (38 not out) aser Shamar Joseph (44) nati team asoshi takok tashi meranga asayaago.

Hazlewood-i tatemsa Jomel Warrican out süja pai iba asaya nung run 43 agütsür wicket 5 agia liasü. Asaya kokdaksütsü atema minute 30 apuloktsüba sülen tatembangbuba over nung

Nathan Lyon-i wicket ana agia liasü.

Tanabuba innings nung Australia team-i kanga meranga asayar ang run 310 yanglu. Parnok rongnung Alex Carey-i (65) run timba yanglua liasü.

Australia team-i asayar 4 out sür run 92 yanglur lia tasemnübuba asaya tenzük, saka Travis Head aser Beau Webster nati run 61 aser 63 yanglua team jenjang junga kümdaktsü. Kasa mapang nung Joseph-i wicket 5 agütsür run 87 yanglua liasü.

World Test Championship final nung South Africa makokba sülen Australia atema iba Test ya mezüngbuba Test

Liverpool-i Preston keeper Woodman alizüktsü mulunga agizükogo

Aami/June 28, 2025 (Agencies): Premier League champions Liverpool-i Preston North End nungi goalkeeper Freddie Woodman alizüktsü mulunga agizükogo.

Arishi küm 28 taina sayar shibai taoba season iba Championship club nungi 44 ben asayaago, pa club den tenangzüktepba yanglur aliba tatemmer dang lir.

Liverpool-i Hokolbarnü ashiba agi, Woodman ya Arne Slot indang squad den taruba ita nungi pre-season training tenzüktsü.

Taruba season atema Vitezslav Jaros aser Harvey Davies naprongla loan nung yokatoker asünung Liverpool-i Alisson Becker aser Giorgi Mamardashvili na den tajangshiba peria aliba keeper

ka aginer. Mamardashvili ya Valencia nungi July 1 nü arutsü.

Liverpool-i taküm küm tetenzüklen Caoimhin Kelleher pound million 18 agi yokogo.

Woodman, shibai 2017 küm England Under-20 team nungi World Cup kokogo, pa Newcastle United, Kilmarnock, Swansea City aser Preston nungi asayaago.

Woodman ya 'association trained' player criteria küboki aiba asayar ka lir asünung pai Uefa squad list nung Liverpool indang non-homegrown slots 17 rongnung ka agitsü nüngdak madoker.

Woodman tebu Andrew ya League Two side Bromley indang manager lir aser pa indang godfather ya taoba England coach Gareth Southgate lir.

Mokokchung nung Grassroot Football Coaching Clinic takok ngua agiogo



35+MFL teloki ayongzüka Grassroot Football Coaching Clinic nung adener tanurtem, Caoches, 35+MFL pur, MDFA pur aser tsüraburtem kar külemi tangokba noksa.

Mokokchung, Aami/June 29(TYO): Mokokchung nung June 23 nungi 27 tashi 35+ Mokokchung Football League (35+MFL) teloki angati ayongzüka Grassroot Football Coaching Clinic ka tanur arishi küm 9 nungi 14 tashi pur atema Mojabi Futsal Turf, Salangtem Ward nung agiba kanga dang takok ngua tembangogo.

Iba Coaching Clinic nungya tetsür 9 densema football asaya meimer tanur ajak agi 125 dena liasü.

35+ MFL teloki iba Grassroot Football Coaching Clinic ya lanurtem nem football asaya jangradakja anitettsü mangdang nung ayongzüka akaba lir. Iba coaching clinic temlidang ano anogo ishika dang lir July ita tetenzüklen 35+ MFL telokisa Under-13 Football Tournament ka Mokokchung nung ayongzüka lir aser iba tournament-ji Nagaland Minerals and Mines nung CEO aser Longterok FC kibur Temjenmoa Jamir-i official süa

tenzüktsüogo aser pai iba tournament ya sponsor asür.

Iba Coaching Clinic nung nungtoko coach Brando Kamson head coach asü aser assistant coaches-temji Alumei, Doson, Tiatoshi, Rongsennungba aser Shiponglepba nung liasü.

Iba sentong nung Mokokchung District Football Association President Wb.N.Akok Lkr-i mapang tatsüka agia jembidang Mokokchung nung football asaya ajungkettsü nükjidong nung 35+ Mokokchung Football League teloki iba ama mapa tajung Mokokchung asoshi shishia bilema timtem aika agia inyakba asoshi tepelaba metetdakja ashi.

35+ MFL teloki iba coaching clinic ayongzüka nung tsüraburtemi pei chirnur mulungsoa yokba den ano tanurtem meina arua 35+ MFL pur den shisa lemsatepa yaritepba asoshi 35+ MFL ajanga tsüraburtem dang tepelaba lemsatep.



Team Heist-i ayongzüka D Khel Ground, Kohima Village nung asayaba 1buba 3x3 Basketball Tournament tetsür aser tebur asaya anprongla Team ABC-i kokogo. Iba asayamung nung Assam nungi densema U-19 tebur team 21 aser U-23 tetsür team 11 ta ajak senteper team 32-i shilem agia liasü

BILEMDANGANG

"Tatok magütsütetra tatok koda angutsü."